



Fasnacht 2024

01000100110000
10IN11100110110
1 DIGITALISATIONE 1
00011 VERITAS 001
01011100100010

NON I AM

Syt em Internet isch glaar,
digidaal isch wunderbaa,
e jeede Fuurz wird bräsentiert
und uf eewig archiviert,
de findisch deert, es isch e Hit,
alles, wo de glaube witt.

Und jeedes Mool, wenn d online goosch,
und Dvyni Spuure hinderloosch,
wiird im Hindergrund perfäggt
alles bis uf s Glainschti träggt,
fir "bessri" Wäärbig, das isch s Zyl,
wiirdsch reduziert uf e Profyl,
in dääre Wält, y find s nit glatt,
blybt Daateschutz e Fygeblatt.

Wenn de langsam dänggsch: Jetz längt s!
Kunnt kinschligi Intelligänz,
si waiss im saichte Dialoog
en Antwort grad uf jeedi Froog,
intelligänt schynts generiert
und drotzdäm nummen aatrainiert,
nit vyyl mee, es isch zem gryne:
E neyi Form vo Suechmaschiine.
Und vyylmoor kunnt, doo kunnt dr s gruuse,

halt aifach numme Bleedsinn uuse,
s haisst verschämmt, wenn s duet bassiere,

d KI wuurd halluziniere.

Intelligänt im Sinn vo gscheyt?

Bis jetz isch s grindlig abverheyt,

s isch raini Gschäftlimacherey,

und isch und blybt e Spiilerey.

E jeede mit me Online-Konto

broduziert uf Gnopfdrugg pronto

us em glainschte Hiirni-Fuurz,

eb woer, eb nit, das isch doch schnuurz,

e Video oder e flotti,

dyschend ächi, scheeni Fotti:

Die beschi Zaapascha, me dänggt s,

syg schynts die vom Tommy Hanks,

d FDP brobiert vergäabe,

Klyymagläaber aane z gläabe,

me het s im Filmlig ganz gnau gsee,

s Sibel schwätz wie d SVP,

d Schuggerey duet, s wär z vergrafte,

ändlig mool dä Trump verhafte,

und au dr Boopscht im schygge wysse

Mänteli isch kinschlig bschisse.

So glaini Gschpäss mit Brominänte

sin wunderbaari Zytigsänte,

me schmunzlet driiber und verpennt,

ass' aim au sälber dräffe kennt.

E pyynlig schlismmi glaini Gschicht,

drzue e Fotti mit dym Gsicht,

online gstellit, scho isch s bassiert:

Dy Ruef isch grindlig ruiniert.

Kai Bild isch me, s isch richtig fyys,

fir iiringend eppis e Bewys,

und drotzdäm wiirgts s, das isch jo s Schlimme:

Mit aigen Auge gsee, s muess stimme.

Das duet aim s räschtlig Gottverdraue

in s Digidaali glatt versaue!

prompt> Laternen- und Wagenausstellung
in 36 Worten

FasnachtsGPT thinking...

result> Die Baseler Lampenexposition ob dem barfüssigen Platz startet am Dienstagpunkt sechzehn Uhr mit einem globalen Blackout, sodass die Wägelchen auf dem Exerzierboden, begleitet von schlagzeugerischen und schrängigen Tönen, im Dunkeln seelenhaft das farbige Kleingeld beleuchten.

f:\> format world: /fs:ntfs /p:3

f:\> shutdown world: /r

execute? y/n_